

EFESIOS

Yi Neczy Huidibi San Pablo Yajniejx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xya-njibicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtíp, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugihuij ajcxy.

Nej je Espíritu Santo conucxy Cristo yjäy

³ Tzoc iibaatim capxpaatim Dios hich ajt nHuindzin Jesucristo yTeedy. Miid co nyajpaatim ma Cristo, paady Dios ti xyconuucxim miid tüg'óciy huidijaty tzomb tza-pjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jëbi nyajpaatim ma Cristo, etz jigix jëbi nyajpaatim ma Dios yhuindu huädz oy njot nhuinma'n, ca' ti bocy nmiid'ajtim. ⁵ Miid co Dios ooy xychojcim xyjihuiyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyiy, co xycöbigaanim nejjihuiy yci'm y'ung. Co Dios jadu'n quejxy je Cristo ya naaxhuingixy, chi yi' yaj'oyiy nej jëbi xycöbjcim nej yci'm y'ung, e jadu'n xymiid'adaanim tzajpjoty. Dios jadu'n ytuñ jadu'n nej yi' anajty tzocyin. ⁶ Tzoc iibaatim capxpaatim Dios ooy miid co mijmay'ajt mij'oy'ajt tuuñ miid hich ajt ycixpi, co quejxy y'ung ya naaxhuiñ miid hich ajt nbocy ycixpi, jigix jëbi nyajpaatim ma yi' y'ung, je' y'ung huidibi ooy tzocy jihuiy. ⁷ Miid co Dios ooy xychojcim xyjihuiyim paady ycixpi yi' y'ung ñi'py teemy yojcy co y'o'cy miid ajt nbocy ycixpi, ti

ajt n'alma xyajnidzoocim etz nbocy ajt ti xyhuinmeecxim. Co jadu'n ytuuñ, chi Dios mijmay'ajt mij'oy'ajt tuuñ miid iich ajt ycixpi. ⁸ Co Dios jadu'n mijmay'ajt mij'oy'ajt tuñ miid iich ajt ycixpi, ti xyajhuinjihuiiyim ti xyajnejhuiiyim yi ytiy'ajt yi yhuinma'ñ. ⁹ Dios yjäygidacpy jadu'n co ti xyajnejhuiiyim nej anajty miidity capxcöducy huidibi ca' pin jecy'ajty huinjihuiy. Nañ jadu'n Dios ti xyajnejhuiiyim nej ti yhuinma'ñypidacy jecy'ajty nej ytuna'ñ anajty miid Cristo. ¹⁰ Je huidibi Dios jecy'ajty ti yajnihuinmayiyy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiyy anajty co pidäga'ñ tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jiiby tzajpjoty etz ya naaxhuiñ Dios jayijp capxcödujc. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jëbi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumyby jadu'n nej yi' tzocy etz nej jäygidägy. ¹² Jadu'n Dios cuydumyby miid iich ajt ycixpi, huidibi jayijp ti nmibijcim ti nmijpidaacim Cristo, jigix jëbi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios miid yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmidooy je ayuc tiy'ajt nej jëbi m'alma ñiidzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy miid ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espíritu Santo huidibi Dios y'ahuaniyy jecy'ajty co xymöhuaanim. ¹⁴ Jada Dios yjihui'ñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma

yi' y'it co anajty xii tiempo yhuaad'ajtni huin'it Dios nihua'na'ñ yajnidzöga'ñ pinjaty yjäy'ajtip ajcxy. Jadu'n Dios tuna'ñ, jigix jëbi ñich ajt n'übaatim ngapxpaatim Dios miid y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cujc'ajt

¹⁵⁻¹⁶ Com ti nnejhuüyich jadu'n nej tiydudägy miich ajcxy ti mmibijccixy ñich ajt nHuindzin Jesús, e nañ jadu'n ti nnejhuüyich jadu'n nej mdzojccixy mjihuüygixy tüg'óciy huidibi mibijccixp Jesucristo. Paady ycixp jabom jabom co Dios nmibijctzooyich, nyajnajxpich jäygidaacin ma Dios miid miich ajcxy ycixpi. ¹⁷ Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinma'ñ je ixpijcin huidibi je Espiritu Santo yejcpy, etz nañ jadu'n xyajnejhuühuipy xyajhuinjhuühuipy ajcxy jac'oy yi' y'ayuc, e tüg'óciy nej yi' ti ytuuñ. ¹⁸ Dios nmibijctzooybich miid miich ajcxy ycixpi, co xyaj'anüyip ajcxy mjot mhuinma'ñ miid yi' ytiy'ajt, jigix jëbi mnejhuüygixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuüygixy nej ymijity yjanchity je pidägy huidibi Dios yegamyb miid tüg'óciy ajcxy huidibi Dios yjäy'ajtip. ¹⁹⁻²⁰ Dios nmibijctzooybich jigix jëbi ajcxy mnejhuühuipy jadu'n nej Dios ymic'ajt miidity. Je' ymic'ajt ca' ycixipy ytigoyipy, e ni pin ca quipxipy. Etz yi' ymic'ajt tumb ma ñich ajt njot nhuinma'ñ nidüg nidüg co ajt nmibijcim. Dios ti xyajnejhuüyim yi' ymic'ajt huidibi ymiid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jilby tzajpjoty. Yi' iñaayb a'oy'amy ma Dios ymijc, etz ane'mdäy tüg'óciy naaxhuñ etz tzajp quipxyi miid Dios. ²¹ Cristo jac mij'ane'min

ymiid, jac mic'ajt miid, ca'ydi jacpinjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cömay y'ity nigí, ca'ydi jac pin huidibi cham tzinaayb, etz huidibi jacjiini tzinähuaamni. ²² Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuüy Cristo nihuäcpejtäy tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. ²³ Je mibijcpidijc jadu'n nipaady nej Cristo ñinïcx, paady ycixpi yi' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

2

Dios chojcpy yjihuüy jäy ajcxy, paady ñidzooccixy y'alma

¹ Ca'ni miich anajty ajcxy mmibijccixy Cristo, ooy anajty mdundigoogixy miid Dios ytiy'ajt, ooy anajty ajcxy mbocymiidity, e jadu'n nipaady nej jihuüy ti m'o'ccixy miid mbocy ajcxy ycixpi etz Dios xyajjugypijccixy huinjemy miid jemybi jugy'ajtin. ² Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñjây ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yi jäy ajcxy yjot yhuinma'ñ huidibi ca' capxymidoogixy Dios. ³ Ma je tiempo täibi ñaxy, nañ jadu'n anajty ndzinaayim jadu'n nej yi jacjadyii naaxhuiñjây ajcxy huidibi capxymidoob yi ca'oybi. Ngapxymidoohuim anajty nninïcx chojcin. Ndundigooyim anajty miid ngi'mjot ngi'mhuinma'ñ. Nguipxyiyim anajty miid yi jacjadyii naaxhuiñjây ajcxy huidibi Dios tzaachytunaanip miid ypocy ycixpi, etz nañ jadu'n nmihuaad'ajtim co Dios

xychaachytuunim miid ajt nbocy ycixpi. ⁴⁻⁵ Oy ixypy iich ajt mihuaadity tzaachypi miid ajt nbocy ycixpi, per Dios mij ooy ti xypa'ayoohuim, e mij ooy ti xychojcin ti xyjihuiiyim, paady ycixp tuuñ may 'ajt miid iich ajt ycixpi co yajjugypijcy je Cristo. E jadu'n quipxyi miid Jesucristo iich ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ miid iich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin huidibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcin quipxy miid Jesucristo, paady ycixp Dios xymohuaanim it lugar jiiby tzajpjoty quipxy miid Jesucristo. ⁷ Jadu'n nej xii tiempo mimb cidacp Dios jadu'n oy tuñ jigix jebi tiy'ajt nmid'ajtim jadu'n nej Dios xychojcin xyjihuiiyim etz xypa'ayoohuim mijcajee, etz mijmay'ajt mij'oy'ajt tuun miid iich ajt ycixpi co nyajpaatim ma Cristo. ⁸ Miid co Dios miich ajcxy ti xychojccixy ti xyjihuiiygixy, paady ycixp yi m'alma ajcxy ti patcixy nidzoocin co ti mmibijccixy Jesucristo. Ca' nminaanim co tijaty ti mdungixy, paady ycixp yi m'alma ajcxy ti patcixy nidzoocin. Hue' janchtiy Dios ti xymooygixy ninigoob ajcxy m'alma nidzoocin. ⁹ Ca' nminaanim huin'it jay ajcxy y'alma nidzoocin paadip co oybi tungixy. Hue' janchtiy Dios jadu'n ci'm ti yaj'oyiy ninigoob nej jay ajcxy jebi patcixy y'alma nidzoocin, jigix ca' pin jebi huaad amij agix nayjihuiiyi. ¹⁰ Com Dios ci'm ti oyduñ iich ajt njemybi tzinaayin jugy'ajtin miid je may'ajt huidibi Cristo ytuun co y'o'cy miid ajt nbocy ycixpi. Jadu'n Dios tuuñ miid iich ajt ycixpi, jigix jebi nduunim oyyay'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yi' tzocy co nduunim oyyay'ajtin.

Jotcujc cham n'ijtim miid Dios, com Cristo xyajpocy-huaatzim

¹¹ Jadu'n miich ajcxy ocjäymejtzcodiï nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudíojäyity, e ni ca' miich anajty ajcxy myajtiy'ajttiïygixy nej huaad mnaydíjigixy Dios yjäy. Paady ycixp yi judíojäy ajcxy ymina'ñ co Dios je' yjäy ajcxy, e miich ajcxy ca', miid yi'da'ajty co miich ajcxy ca' myajtiy'ajttiïygixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judíojäy xycöbijccixy, etz ni ca' anajty mbadaangixy huidibi Dios y'ahuaniïy ma yi judíojäy ajcxy, etz ni ca' anajty ti mjijp'ijxcixy ma Dios, etz ni ca' miich anajty ajcxy myajpatcixy ma Dios. ¹³ Jadachambi, miich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ñi'py teemy vojcy miid miich ajcxy mbocy ycixpi. ¹⁴ Jesucristo ci'm yaj'oyiïy je tzip je capxy nej anajty ïich ajcxy judíojäy etz miich ajcxy huidibi ca' yjudíojäyity naymidzip'ajtim, e cham jotcujc n'ijtim. Jesucristo ci'm yajtigoy je judíojäy ycötujcin huidibi anajty tzipcojp capxycojp ma ïich ajcxy etz ma miich ajcxy. Jesucristo yajtügmuyc judíojäy, etz huidi ca' yjudíojäyity. ¹⁵ Jesús miid yci'm ninïcx yajtigoy je jecy'ajtypi cötujcin co oy yaj'ögyii cruudzcixy. Co Jesús y'o'cy, huin'it yajtügmuycy judíojäy etz huidibi ca' yjudíojäyity. Huin'it oy yaj'ahuimbity tügpicy jäy jemybi huidibi Dios yjäy'ajtip. E jadu'n ajcxy yajcijxy yajmay je tzip capxy. ¹⁶ Co Cristo oy yaj'ögyii cruudzcixy, huin'it yajcijxy yajnaxxy je tzip capxy jadu'n nej yi judíojäy anajty midzip'adyii yi' ajcxy huidibi ca' yjudíojäyity. Etz nañ huin'it Cristo yajtügmuycy yi judíojäy miid huidibi ca' yjudíojäyity. Paady ycixp Dios ycöbiga'ñyii judíojäy ajcxy etz huidibi ajcxy ca'

yjudíoŷäyity agujc jotcuŷc.

¹⁷ Je Cristo miin anajty ya naaxhuiñ etz capxhuäcxy oybi tiy'ajt jadu'n nej jëbi ajt nbaatim jotcuŷc'ajtin ma Dios. Ycapxhuäcxy anajty ma miich ajcxy huiidibi ca' yjudíoŷäyity, huiidibi ca' anajty miidity Dios ytiy'ajt. Etz nañ jadu'n ycapxhuäcxy Dios ytiy'ajt anajty ma iich ajcxy judíoŷäy huiidibi jamiid anajty Dios ytiy'ajt. ¹⁸ Miid co Cristo may'ajt ti tuuñ co xy'adigiŷiyim xyjottigiŷiyim Dios yjihu'iñ ymic'ajt, paady ycixp nidüg'óciy iich ajt nyaj-paatim ma Dios jadu'n nej tügpicy jäy, tanto judíoŷäy etz nañ jadu'n huiidibi ca' yjudíoŷäyity. ¹⁹ Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huiidibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tú'ciy miich ajcxy mnay-gomájtzigixy ma Dios miid judíoŷäy ajcxy. Jadu'n miich ajcxy etz judíoŷäy ajcxy nipaady cham nej jihu'iy ajcxy mdüguugy mdügmigüg. ²⁰ Miich ajcxy ti mmijpidaaccixy je tiy'ajt huiidibi Jesús y'apóstol ajcxy ti capxhuäcxy etz je tiy'ajt huiidibi Dios y'ayucnajtzcaxhiybi ti capx-huäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huiidibi jaccopicyip ma je poch'ijx chondägy. ²¹ Dios jadachambi tiempo ycojyp ymacxyp jadügpicy jäy huiidibi yjyä'adaanip huiidibi tügjijp mijpidaaccixy Cristo, huiidibi tú'ciy ijtcixyp miid Cristo. Jadu'n jadayaabi tügpicy jäy nipatcixy nej tüg tijc ma jäy ajcxy Dios ojadajtcixy. ²² Miich ajcxy myajpatp ma Cristo quipxyi miid nidüg'óciy yi mayjay ajcxy huiidibi mijpidacp Dios etz huiidijaty mi'ijtp je Espíritu Santo ma ajcxy yjot yhuinma'ñ, jadu'n miich ajcxy mjugy'ajtin nipaady nej Dios chinaydac.

3

Pablo yi' je' miiid cötujuin co capxhuäcxy Dios y'ayuc ma pin ca' yjudíojäyity

¹ Hich Pablo, nyajpatpich pujxtigoty miiid co nduuñich ma Jesucristo ytung ma miich ajcxy huidibi ca' yjudío-jäyity. Paady ycixp nmibijctzooybich Dios miiid miich ajcxy m'oy'ajtin ycixpi. ² Mnejhuüiyb ajcxy com Dios mijmay'ajt ti tuuñ miiid miich ajcxy ycixpi, paady yi' ti xyajñibicyich ngapxhuäcxiwich ma miich ajcxy yi' y'ayuc ytiy'ajt. ³ Dios ti xyajnejhuüiyich yi' ytiy'ajt huidibi jecy'ajty yüch y'ijt. Jada tiy'ajt yinjaty hueeñjaty iich miich ajcxy ti nnijayñiygixy jayijp'aty. ⁴ Co miich je necy mgapxip, huin'it ajcxy mnejhuüiipy co iich nnejhuüiyich je Cristo ytiy'ajt huidibi ijtp yüch. ⁵ Jada tiy'ajt maabi Jesucristo, Dios ca' ni pin yajnejhuüiy jecy'ajty. Jadachambi xi tiempo Dios miiid je Espíritu Santo yajnejhuüiy Jesucristo ytiy'ajt je Jesús y'apóstoles ajcxy etz je Dios y'ayuc najtzcaxiiby ajcxy. ⁶ Jada je' je tiy'ajt huidibi jecy'ajty yüch anajty ijtp, co yi' jäy ajcxy huidibi ca' yjudíojäyity ypadamyb ajcxy Dios y'oy'ajtin quipxyi miiid yi' judíojäy ajcxy, etz nañ jadu'n yi' ajcxy yajpaady ma Dios tú'ciy miiid yi' judíojäy ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi' judíojäy co möhuaangixy pinjaty mibijccixp Jesucristo.

⁷ Dios mijmay'ajt ti tuñ miiid iich ninigoob co ti xyajñibicyich jada tung, e xymöyich mic'ajt co ngapxhuäcxiwich Jesucristo y'ayuc ytiy'ajt oybi ma yi' jäy ajcxy huidibi ca' yjudíojäyity. ⁸ Hich jactimmudzip ma yi' maybi mibijcpidijc ca'ydi jacpin, per ca' ñejity. Dios may'ajt oy'ajt ti tuuñ ma iich, e ti xypidägyich ma yi' ytung co ngapxhuäcxyich jada oybi tiy'ajt ma jacjadyi jäy ajcxy jigix jëbi ajcxy patcixy ma Cristo Jesús mij'oy'ajtin,

huidibi ca' pin huinjihuïy jadu'ñyi ymijity. ⁹ Dios ti xyajñibicyich co ngapxticxibich ma tüg'óciy jäy ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tuna'ñ je oybi miid tüg'óciy jäy ajcxy. Yi' je' Dios huidibi ti yajcojtäy tüg'óciy tijaty ya naaxhuiñ etz jiby tzajpjoty yajpatp. ¹⁰ Jadu'n Dios capxcödujcy co je tzajpjoty tzinaaybi ajcxy huidibi ane'min etz mic'ajt miid, tiy'ajt padaangixy ma yi mibijcpidijc jadu'n nej Dios mijhuinma'ñ canaagnax tuñ miid jäy ajcxy nidüg'óciy huidibi mibijccixp Cristo Jesús. ¹¹ Jadu'n Dios ti cuyduuñ miid ajt nHuindzin Jesucristo jadu'n nej jecy'ajty capxcödujcy. ¹² Miid co nyajpaatim ma Jesucristo paady ycixp agujc jotcujc nmigapxim nmihuingonim Dios. Miid co nmibijcim Jesucristo paady ca' ndzigiyim ndzo'yduunim ma Dios yhuinduu. ¹³ Paady ycixp may'ajt nbijctzooyich miid miich ajcxy co ca' nigí m'ixtigihuäccixy ma ajcxy mmibijcin. Etz ca'ajcxy xyñidajipy xyñimayipyich co tzaachypi nminaxyich nyajnaxyich miid miich ajcxy ycixpi. Com miid co ti nyajnaxyich tzaachypi miid miich ajcxy ycixpi, paady jëbi miich ajcxy oy'ajtin mbatcixy.

Cristo chojcpy yjihuiyb jäy ajcxy

¹⁴ Com Dios mijmay'ajt ti tuuñ miid judíojäy etz miid huidibi ca' yjudíojäyity, paady njatyhuingoxtinaaybich Dios, ich ajt nHuindzin Jesucristo yTeedy, e nmibijctzooybich Dios miid miich ajcxy ycixpi. ¹⁵ Tüg'óciy tzajpjoty tzinaayb etz tüg'óciy naaxhuiñyäjy huidibi mibijccixp Dios, jëbi nidüg'óciy yminaangixy: “Dios ich ajt nDeedy.” ¹⁶ Paady nmibijctzooybich Dios Teedy miid miich ajcxy ycixpi, co Dios je huidibi mic'ajt etz oy'ajt ymiid mijcajee, co xymöhuipy mic'ajt ma ajcxy mmibijcin miid yi' yjihui'ñ ymic'ajt huidibi yajpatp

ma ajcxy mjet mhuinma'ñ. ¹⁷ Dios nmibijctzooybich miid miich ajcxy ycixpi co Cristo ymic'ajt yajpaadip ma miich ajcxy mjet mhuinma'ñ miid co mmibijccixy Cristo. Jadu'n Cristo ymic'ajt yajpaadip ma ajcxy mjet mhuinma'ñ, jigix jëbi miich ajcxy huidibi mmibijccixp Cristo, jëbi mdzójcixipy mjihuüygixipy mijcajee huinixii huinitiempo je mibijcpidijc etz tüg'óciy jacjadyii jäy. ¹⁸ Nañ jadu'n Dios nmibijctzooybich miid miich ajcxy ycixpi co miich ajcxy etz tüg'óciy mibijcpidijc mnejhuüygixipy jadu'n nej Cristo xychojcin xyjihuiiyim mijcajee. E yi' chojcin yjihuiiyin jadu'n nipaady nej tüg'óciy jac cixip jac mijip, jac yooñip jac ciicyip ca'ydi ni huidi tijc. ¹⁹ Nmibijctzooybich Dios co xyajnejhuüygixiyip xyajhuinjihuüygixipy nej Cristo xychojcin xyjihuiiyim mijcajee nidüg'óciy iich ajt, ixti ca' huaad nhuinjihuüydaayim jadu'n nej Cristo xychachchojcin xychachjihuiiyim. Nmibijctzooybich Dios co xypubéjtcixip, ixti mabaad mmiid'ajttaaygixy Dios y'oy'ajtin.

²⁰ Jadachambi, cömay Dios y'ity huidibi mic'ajt miid, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, miid je ymic'ajt ycixpi huidi tumb ma iich ajt. ²¹ Huen tüg'óciy mibijcpidijc ajcxy jäymejtcixy ojadájtciy Dios etz Cristo Jesús jabom jabom huinixii huinitiempo. Jadu'n jada. Amén.

4

Tú'ciy n'ijtim miid Espíritu Santo ycixpi

¹ Nyajpatpich pujxtigoty miid ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzináaygixipy jadu'n nej mihuaad jäy chinaaygixy huidibi Dios ti yhuin'íjxigixy, com Dios miich ajcxy

ti xyhuin'ijxcixy. ² Pidaaccix mjet mhuinma'nñ yung naxy, nicy xeemy jäy'ajtcixy, naymecxtújcigix miñ xyipy, naymi'oyjäy'ájtigixy, jigix ñiguëxigip co mnaychójcigixy mnayjihuíyigixy miñ xyipy. ³ Miid'adipy ajcxy mjet mhuinma'nñ tú'ciy miid je Espíritu Santo ypubejtin jigix jëbi mdzinaaygixy jotcuyc ca' ma tzip capxy. ⁴ Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'nñ. Dios ti xyhuin'ijxim, jigix jëbi quipxyjaty njijp'ijxtaayim je oybi huidibi nbadaanim jiiby tzajpjoty. ⁵ Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jëbi nmijpidaacim, etz tügpajc nmiibejtim miid Jesucristo yxi. ⁶ Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidijc. Yi' je' huidibi nihuindzin'ajttaayb. Yi' je' huidibi may'ajt tumb miid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinma'nñ.

⁷ Dios may'ajt oy'ajt ti tuñ miid nidüg nidüg ñich ajt co Cristo xymooyim mic'ajt, jigix jëbi nidüg nidüg tuunipy Dios ytung nej ypadyii. ⁸ Paady ycixp jaybety ymiñ ma Dios jadu'n ymina'nñ:

Co Cristo ypättigiyy tzajpjoty, chi ymiidpättigiyy may machjäy, e nañ jadu'n Cristo moy jäy ajcxy mic'ajt (dones).

⁹ ¿Nej co jadu'n Dios y'ayuc yminañ co je Cristo ypättigiyy tzajpjoty? Hue' je' jadu'n yminañ miid co je Cristo jayijp ycidacy etz ooy ayooy ya naaxhuiñgixy. ¹⁰ Je Cristo yi' je' huidibi cidaac ya naaxhuiñ choon tzajpjoty, nañ jadu'n ypättigiyy jadüg'oc tzajpjoty jactim'o'c'am. E yi' je' ymic'ajt yajpatp ma tüg'óciy huidijaty jiiby tzajpjoty etz tüg'óciy huidijaty ya naaxhuiñ. ¹¹ Je Cristo ymooygixyp nidüg nidüg yi' ytumbi mic'ajt. Ni-

jējity mooygixy mic'ajt jēbi nidiy'ajt'ájtigixy co je' je' je Cristo. Nijējity mooygixy mic'ajt jēbi najtzcapxhiygixy Dios y'ayuc. Nijējity mooygixy mic'ajt jēbi capxhuācxixy yi' y'ayuc. Nijējity mooygixy mic'ajt jēbi capxhuijixy yi mibijcpidijc miid Dios ytiy'ajt. Nijējity mooygixy mic'ajt jēbi yaj'ixpijccixy Dios ytiy'ajt. ¹²E jadu'n je Cristo mic'ajt moydaaygixy yi' yjāy, e jadu'n yajni'ixiydaaygixy miid ytung ycixpi. E miid yi' ajcxy ytung yjacyujcpedipy yi mibijcpidijc y'ixpijcin, ixti mabaad jac miid'adipy ajcxy Cristo y'oy'ajtin. ¹³Jadu'n Cristo mic'ajt xymooyim, jigix jēbi nidüg'óciy iich ajt ytügiyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'ñ, nmi'ijtim Jesucristo ytiy'ajt cixy ca'pxy. ¹⁴Ca' n'idaanım miid ajt nhuinma'ñ nej pi'ctijc yhuinma'ñ ymiidity. Je pi'ctijc ajcxy janam jadzoc yhuinma'ñ ytigajtzixy. Jadu'n ajcxy nipaady nej je miy huidibi je poj yajpojmiyb yajpojxijpy. Co cixy ca'pxy nmiid'ajtim Cristo ytiy'ajt, ca' pinjaty xyhuin'iinim miid huing ayuc oymibijcniip huidibi ca' yjanchity. ¹⁵Hue' janchtiy ngapxim je tiy'ajt tiybi miid tzojcin jihuiyin, jaydēbi njacyeecom ajt nmibijcin etz njacnejhuiyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶Cristo etz je mibijcpidijc nipatp nej tüg ninix. Cristo ñipatp nej je ninix cohuajc huidibi ane'mb etz mic'ajt mooyb je ninix. Etz yi' mibijcpidijc ñipatp ajcxy nej je ninix huidibi Cristo y'ane'myb etz mic'ajt möy. Ma Cristo tüg'óciy mibijcpidijc mic'ajt patcixy huidibi yajtügiyip ajcxy ymibijcin etz nañ jadu'n yaj'jtiygixy tügmyc. Nidüg nidüg mibijcpi ymic'ajt patcixy ma Cristo, jēbi tungixy Cristo ytung nej ypadyi. E jadu'n yeccixy nidüg'óciy ma ajcxy ymibijcin, etz nañ jadu'n yajyeccixy chojcin yjihuiyin miid ymigügtijc.

Je jemybi jugy'ajt huidibi nbaatim ma Cristo

¹⁷ Paady ycixp nnimäyich miich ajcxy etz nyaj nibijccixy miid ajt nhuindzin Jesucristo ycötujcin, co ca' huaad mdungixy loci huinma'ñ huidibi ca' choubaady ma Dios, jadu'n nej jacjadyii jäy ytungixy huidibi ca' mijpidaaccixy ajt nHuindzin Jesucristo. ¹⁸ Ca' huaad mdzinaaygixy jadu'n nej jacjadyii jäy ajcxy chinäy miid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinixiibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihuiy co ytundigooygixy. Ooy ajcxy minicxnajxcixy yi jibic-huinma'ñ. Ooy ajcxy nijot'ajtcixy mijcajee co túngixipy tüg'óciy tijaty jibic-huinma'ñ. ²⁰ Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy Cristo ytiy'ajt, ²¹ pen janch miich ajcxy ti mmidoogixy yi' y'ayuc, pen ti m'ixpijccixy je tiy'ajt huidibi yajpatp ma Cristo. ²² Ti miich ajcxy m'ixpicy co copicy m'ixmájtzcixipy yi jibic-huinma'ñ nej anajty mni-jot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy miid je jibicpi huidibi anajty ajcxy mnijot'ajtcixyp, ci'm anajty mnayhuin'ñinigixy. ²³ Ixmajtzcix jibicjot jibic-huinma'ñ. Pidaaccix mjot mhuinma'ñ co mguy-dunaangixy Cristo ytiy'ajt jemybi. ²⁴ Miid'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ miid tudägy'ajtin etz huädz'ajtin.

²⁵ Paady ycixp ca'huaad m'iindaaccixy, nidüg nidüg cápxcix huidibi janchip miid migügtijc, miid co quipxy-jaty nyajpaatim ma Jesucristo.

²⁶ Pen miich ajcxy mmijotma'tpy yi mmigüg, ca' mmigüg migapxtigooygixy midundigooygixy, mic'amy ajcxy mjäydigóoygixipy yi mjotmädiñ yajijp ca'ni anajty

xii ycidacyñi. ²⁷ Ca' mnayyéjciçixy ma je mujcu' co je mujcu' xymimadägipy.

²⁸ Yi jäy ajcxy huidibi meetzcixp, huen ixmajtzcixy meedzi, etz ijxtähuiçy ytung. Co ytuniçy ma ci'mdung jëbi pubediçy ajcxy ymügüçtjç huidibi yajmayajtçixp tijaty.

²⁹ Ca' mgápçcixiçy jibic ayuc. Cápçcix oy ayuc huidibi jëbi mügüg ajcxy jäygidaaccixy, huidibi pubejtp etz ya-yyeegy je mibiçin, huidibi yejçp oy'ajtin ma pin ajcxy amido'ijtp. ³⁰ Ca' huaad mgapçcixy mmiydaaccixy ayuc huidibi yajjotmaybiçp je Espíritu Santo huidibi Dios yjë'ajtpy. Je Espíritu Santo huidibi miich ajcxy miid ma mjot mhuinma'ñ, yi' je' huidibi tiy'ajt yejçp co miich ajcxy Dios yjäy'ájtigixy, co anajty Cristo ymiñ ya naaxhuiñ jadüg'oc huin'it mbadaangixy jugy'ajtin etz tzinaayin huidibi ca' ycixiçy ytigoyiçy ni mina.

³¹ Yajqueeccix yi jibicpi ma ajcxy mjot mhuinma'ñ, jadu'n nej co mjot mhuinma'ñ ta'm mjihuiçyçixy, jadu'n nej co tzojç mjotma'tcootçixy, jadu'n nej co mnaymijotmá'tigixy, jadu'n nej co mnayhuin'ójiçixy nayjijp'ójiçixy. Ca' huaad mmügüg mnigapçcixy mni'ojiçyçixy. Ca' jibicpi mnijot'ajt'adiitçcixy miid ajcxy mmügüg ycixpi. ³² Hue' janchtiçy oybi mhuinmáayçixiçy miid mmügüg ajcxy ycixpi. Nayba'ayóohuiçixy nidüg nidüg. Nayméecçixix nidüg nidüg. Com nañ jadu'n Dios ti huinmecçy miich ajcxy mbocy miid co myajpatçcixy ma Cristo.

5

Nejjëbi chinaayçixy yi Dios yjäy ajcxy

¹ Com miich ajcxy ñipatpy nejjihuüy Dios y'ung'ájtigixy, e Dios ooy xychojccixy xyjihuiiygixy, paady copicy naychójcigixy nayjihuiiyigixy miñ xyipy, jadu'n nej Dios ti xychojccixy ti xyjihuiiygixy. ² Jabom jabom ma mdzinaayin naychójcigix nayjihuiiyigix nidüg nidüg, tim jadu'n nej Cristo xychojcm xyjihuiiyim, e yjugy'ajt yejcy miid ajt nbocy ycixpi, e jadu'n Dios jäygidacy nej Cristo ytuñ.

³ Miid co miich ajcxy Dios xyjäy'ájtigixy, paady tzinaaygixy miid huädz mjot mhuinma'ñ. Ca' huaad m'oc'hibáatcixyñi m'occapxpáatcixyñi yi töxyjäy migapxtigoyii, etz yi jibic ayuc capxi, yi jibic-huinma'ñ nijot'adii etz yi meñ adzogii. ⁴ Miid co mDios miich ajcxy xyjäy'ajtp, paady ycixp ca' huaad mgápxcixipy ayuc huidibi tzo'ydu'ñ yejc, ni ca' huaad mgápxcixipy huidi ca' y'oyjäygidacnity, etz ni ca' huaad mguxiiccixy m'aniidaaccixy, com yi jibic ayuc ca' Dios jäygidägy. Tzoc yajnaxim jäygidacn ma Dios com Dios ti xyajhuaatzim ajt njot nhuinma'ñ. ⁵ Janch tiy'ajt jada co pinjaty tundigooyb miid huingbi töxyjäy, pinjaty jibic-huinma'ñ miid, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meñ adzojcp, Dios ca' tzocy, tim jadu'n nej yi' ca' tzocy pinjaty ojadajtp tzaadzech etz quipychech. ⁶ Ca' mnayyéjcgixy co jäy ajcxy xyhuin'íngixipy miid ayuc huidibi ca' ytiy'ajtity ca'p choubaady. Miid co jäy ajcxy capxcixy ayuc huidibi ca' ytiy'ajtity, paady ycixpi Dios tzaachytuna'ñ tüg'óciy jäy ajcxy huidibi capxycomidodacp yi' y'ayuc. ⁷ Ca' huaad miich ajcxy mnaymigüg'ájtigixy, ca' miid mnayyöymújcgixy yi jadu'mbi jäy ajcxy huidibi ca' capxymidoogixy Dios.

⁸ Jayjip ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuüy, e jadu'n nipaady anajty

nej jihuiŷy myajpaady ajcxy agootztuum. Jadachambi mnejhuiŷygyxyp Cristo ytiy'ajt, e jadu'n nipaady nejjihuiŷy mdzinaaygixy ma tüg tiicxin. Paady ycixp jatyim cuydungixyp Cristo ytiy'ajt ma yi mdzinaayin mjugy'ajtin ajcxy, jadu'n nej jëbi huaad quëxŷy co mmibijccixy Cristo. ⁹ Co mmiid'ajtim Cristo ytiy'ajt, chi nduunim huidibi y'oyip, huidibi tudägyip, huidibi tiy'ajtip. ¹⁰ Ixpijccix je tiy'ajt huidibi Dios yjägidyacy. ¹¹ Ca' miich ajcxy mnaymigüg'äjtiŷy mmiid yi jäy ajcxy huidibi yajpatcixp agootztuum, huidibi tungixy huidibi Dios ca' jäygidägy. Miich ajcxy capxhuijcxix mmiid Dios ytiy'ajt yi' ajcxy huidibi agootztuum tzinaayb. ¹² Tzo'yduunim ajt co jay nigapxcixy nimiyaaccixy je jibicpi huidibi ajcxy ytumyb ayüch ameech. ¹³ Co n'ixquipxim yi jadu'mbi jäy ajcxy ayuc mmiid Dios y'ayuc, chi niguëxŷy pen janch tiy'ajt o pen ca' ytiy'ajtiŷy, jadu'n nipaady nej ti nyajpidzimim je ajcxy ayuc ma yi agootztuum, etz nbidaacim ma yi tiicxin. ¹⁴ Paady ycixpi Dios y'ayuc jadu'n yminañ:

Mäyhuijip miich ajcxy huidibi jadu'n nipatp nejjihuiŷy mdzachmaagixyp. Jugypijccix miich ajcxy huidibi jadu'n nipaady nejjihuiŷy ti m'öccixy. Cristo xycodiiicxixipy mmiid yi' ytiy'ajt.

¹⁵ Paady naygüend'äjtiŷy huidibi tiy'ajt yajtungixp ma yi chinaayin. Tzinaaygix jadu'n nejjihuiŷy mnejhuiŷygyxyp Cristo ytiy'ajt, e ca' mdzinaaygixy jadu'n nej huidibi ajcxy ca' nejjihuiŷygyxyp Cristo ytiy'ajt. ¹⁶ Ni'ixi'ijtcix jabom jabom jëbi mguydungixy Cristo ytiy'ajt. Jadachambi xi tiempo mayjäy ytundigoogyxyp mmiid Cristo ytiy'ajt. ¹⁷ Ca' loci huinma'ñ myajtungixy, per nejhuiŷygyxyp nej Dios tzocy co mdungixipy. ¹⁸ Ca' huaad m'ijtcixy amügy jäy, com yi jocniñ xyajnicxixipy

ayo'nduum. Nīgi oy mi'ijtcixy Dios yjihui'ñ ymic'ajt may'amy ma ajcxy mjot mhuinma'ñ. ¹⁹ Naymigápaxigixy miñ xyipy miid yi salmo ayuc, miid yi himnos. Huin'igix Dios miid je iy huidibi je Espíritu Santo xymooygixyp. Huin'igix etz ojadajtcix Dios cixyjot huinijot. ²⁰ Jatyim yajnajxcixy jabom jabom jäygidaacin ma ajt nDios Teedy ma ajt nHuindzin Jesús yxi, miid tüg'óciy ycixpi nej ndunim n'ayoohuim.

Nej huaad chinaaygixy pinjaty picychinaaygixy

²¹ Miid co miich ajcxy mhuindzigiy Dios, paady ycixp miich ajcxy mnayajmij'ájtigixy mnaygapxymidóogixy miñ xyipy.

²² Miich ajcxy töxyjäydijc yajmij'ajtcix capxymidoogix yi mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo. ²³ Com je töxyjäy ñäy nigohuajc'ajtp ma ytöxyijc ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huidibi nihuänamb yajnödögamb yi mibijcpidijc. ²⁴ Tim jadu'n nej yi mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidóogixy yi ñäy ajcxy.

²⁵ Nañ jadu'n tzocy co je yëydijc huen tzocy jihuïy ytöxyijc, tim jadu'n nej Cristo tzocy jihuïy yi mibijcpidijc, e paady ycixp yejc yi' yjugy'ajtin miid yi' ajcxy ycixpi.

²⁶ Cristo yejc yjugy'ajtin miid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'ñ. Cristo yajhuaatzi yi mibijcpidijc ajcxy yjot yhuinma'ñ miid yi'y'ayuc etz co niibejt ajcxy miid nii. ²⁷ Jadu'n Cristo yajhuäch yi mibijcpidijc ajcxy yjot yhuinma'ñ, jigix jëbi ajcxy nayguëxigiyb ma yi' yhuinduu miid huädz yjot yhuinma'ñ. Je mibijcpidijc ajcxy nipaady nej tüg nijen huidibi huädzip, ca' ma ytijy ymächity.

²⁸ Jadu'n tzocy co je yëydijc huen tzocy jihuïy ytöxyjc tím jadu'n nej ci'm naychogyii. Yi yëydijc huídibi tzojcp jihuiïyb ytöxyjc nañ jadu'n ci'm ñaychogyii. ²⁹ Ca' ji ni pín huídibi ca' ñaychogyii ci'm. Hue' janchtiy ycuend'ajtpy etz yajcüxyii yajpedyii yci'm ninícx, tím jadu'n nej jáy ajcxy cuend'ajtcixy yci'm ñinícx nañ tím jadu'n Cristo ycuend'ajtpy yi mibijcpídjic. ³⁰ Jadu'n Cristo cuend'ajtpy yi' yjáy, com jadu'n ajcxy nipaady nej yi' ñinícx. ³¹ Com copicy je yëydijc tzogíp jihuïhuíp ytöxyjc jadu'n nej Cristo tzocy jihuïy yi mibijcpídjic. Paady ycixp je yëydijc ixmadzipy ytaj yteedy, e ypuđigíhuipy ytöxyjc, e jadu'n ajcxy chináhuipy nej jihuïy ytüg-pajcity. ³² Ooy chachmijhuinma'ñity jada tiy'ajt huídibi yüch anajty ijtp, e yi' íich jadu'n tijpy yi' Cristo etz je mibijcpídjic. ³³ Cuendipijccix jada tiy'ajt co nidüg nidüg miich yëydijctijc ajcxy huídibi pijccixp copicy mdzogípy mjihuïhuipy ajcxy mdöxyjc, tím jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adípy ñáy.

6

¹ Pi'ctijc ajcxy huídibi mibijcp Jesucristo, copicy mgapxymídoohuipy ajcxy mdaj mdeedy, com tiy'ajt jadu'n. ² Yi' Dios ycötujcín huídibi mínaamb: “Yajmij'ajtcix mdaj mdeedy”, yi' ooy ytimycopicyity. Nañ jadu'n co nguyduunim jada cötujcín, huin'it Dios jecy xyajtzinaayim. ³ Co miich ajcxy jadu'n myajmij'adípy mdaj mdeedy, huin'it Dios xymöhuipy ajcxy jotcuje'ajtin, e nañ jadu'n xyajtznáaygixípy jecy ya naaxhuiñ.

⁴ E miich ajcxy huídibi ungdeedy'ajtcixp, ca' nígoo myajjotma'tcotcixy yi' m'ung ajcxy. Ane'mgix yajyeccix yi' m'ung ajcxy miid Dios y'ayuc ytiy'ajt, jaydebi capxymídoogixípy ajcxy Dios.

⁵ Miich ajcxy huidibi tumbi'ajtp ya naaxhuiñ, capxymidoogix yi mhuindzin ajcxy, etz tungix miid tudägy'ajtın, etz yajmij'ajtcix etz tzigiiygix. Tim jadu'n nej jihuiy mgapxymidoogixy yi mHuindzin Jesucristo.

⁶ Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindiıxcixy, e chi co je' yjihuäcni, chi nigoo mhuäccixni mdinäaygixni. Tungix jadu'n nej huaad jäy ytuungixy yi huidibi mijpidaaccixp Jesucristo. Tungix cixyjot huinjot jadu'n nej Dios tzocy mdungixipy.

⁷ Tumbidıjc ajcxy, tungix mdung cixyjot huinjot, tim jadu'n nej jihuiy mdungixy je Huindzin Jesucristo ytung, e ca' yjäydingity. ⁸ Mnejhuiyb miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuuñ, ca' ñejity pen yci'mdung ytumyb, o pen ytumb miid tüg huindzin.

⁹ Miich ajcxy huidibi nihuindzin'ajtp tumbidıjc, oy'amy ane'mgix mdumbi ajcxy. Ca'm'adzigıygixipy ca' mdzaachytungixipy. Ajihuiyigixy co miich ajcxy etz nañ jadu'n mdumbi ajcxy miid ajcxy mHuindzin tzajpjoty, e yi mHuindzin tzajpjoty pi quipxyjaty tiyduna'ñ nidüg'óciy miich ajcxy.

Je mic'ajt huidibi je miıbjcpıdıjc ajcxy ypatcixyp miid Dios yjihui'ñ

¹⁰ Jadügnax, migügtıjc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt miidıty, paady jėbi miich ajcxy mbatcixy yi mmic'ajtın ma yi'. ¹¹ Naygohuaanıgixy miich ajcxy ma je mujcu' miid tüg'óciy tiy'ajt huidibi Dios xymooyım, huıdi miid naygohuaanıım ma je mujcu', e jadu'n ca'ydi je mujcu' xymimadaacıım miid anıı. Jadu'n Dios ytiy'ajt nipaady

nej tujt etz pujxnijen huidibi soldados ajcxy miid naygohuaangixy tzipjoty. ¹² Hue' janchtiy xymidzip'ajtim poj naaxhuiñ, ca'oybi, mujcu'dijc, etz tüg'óciy mic'ajt miidpi huidibi midzip'ajtp Dios ya naaxhuiñ etz jibiy tzajpjoty, ca'p iich ajt nmidzip'ajtim naaxhuiñjáy. ¹³ Paady ycixp yajtúngixy tüg'óciy mic'ajt etz tiy'ajt huidibi Dios ti xymooygixy, jigix jébi mmimadaaccixy je ca'oybi co anajty xyajtundigoyaangixy. E jadu'n jébi mimadaaccixy je ca'oybi miid ajcxy mmibijcin. E co anajty ti mmimadactaaygixy, huin'it m'íjtcixipy mic ma ajcxy mmibijcin. ¹⁴ Ca' m'ixtigihuáccix ma ajcxy yi mmibijcin. Nayñi'ixiiygix miid Dios ytiy'ajt, jadu'n nej jáy ajcxy ñayhuindádzigixy co ytunaangixy. Nayñi'ixiiygix tim jadu'n nej soldados ajcxy ñayñi'ixiiygixy miid pujx nijen ma caach co chiptunaangixy. ¹⁵ Nayñi'ixiiygix miid Dios y'ayuc, jigix jébi ajcxy nicxy mgapxhuáccxi Dios y'ayuc huidibi jotcuyc'ajtin yejcp. Co jadu'n mdúngixipy, jadu'n nibaadip tim jadu'n nej soldados ajcxy ñayñi'ixiiygixy co yajtigiiygixy yzapato co ytüyöyaangixy. ¹⁶ Yi' huidibi jac copicyip ca'ydi jac ni ti, mibijccix tiydudägy Jesucristo. Miid ajcxy yi mmibijcin jébi mnaygohuáanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuáanigix ma je tip huidibi yajnajtztiiibiiyb miidi jiin. ¹⁷ Nayñi'ixiiygix miid Cristo ytiy'ajt huidibi miid ajcxy m'alma xyajniidzoocip, tim jadu'n nipaady nej soldados ajcxy ñaygohuáanigixy co pidaaccixy ypujx cöjup co chiptunaangixy. Naygohuáanigix miich ajcxy miid Dios y'ayuc huidibi jadu'n nipatp nej tüg espada huidibi je Espíritu Santo ti xymooygixy. ¹⁸ Mibijctzoogix Dios miid tüg'óciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom miid je

Espíritu Santo ypubejtín. Huijy ycujc m'ijtcixipy, ca' mjetmetzcíyigixipy. Mibijctzoogix Dios miid tüg'óciy mibijcpidijc ajcxy ycixpi. ¹⁹Nañ jadu'n mibijctzoogix Dios miid iich ycixpi, co huen xymöyich ayuc etz jotcujc'ajtin, jigix jëbi ngapxhuäcxibich huinmic jotmic yi' y'ayuc ytiy'ajt huidibi ca' pin jecy'ajty nejhuüiygixy. ²⁰Dios ti xyajñibicyich jada tung jëbi nyajnicxyich yi' y'ayuc ytiy'ajt ma je mayjäy ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios miid iich ycixpi co xyajjotmicpigipyich jigix jëbi ngapxhuäcxich yi' y'ayuc huinmic jotmic.

*Capxpoox*in huidibi cogixiñip

²¹Ooy ndzocy njihuüyich je Tíquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tíquico miich ajcxy xyajmiidmiydägipy tüg'óciy je tiy'ajt nej nyajpaadyich ya, etz tüg'óciy tung huidibi ya ndumybich. ²²Nguexaamybich Tíquico ma miich ajcxy jigix jëbi xymiidmiydägipy ajcxy jadu'n nej nyajpaadyich ya, e miid jada tiy'ajt jëbi miich ajcxy mjetcugüygixy.

²³Huen Dios Teedy etz ajt nHuindzin Jesucristo may'ajt tunipy miid miich ajcxy, jigix jëbi jotcujc mdzinaaygixy, etz nañ jadu'n jëbi mnaychójcigixy mnayjihuiüygixy miñ xyipy, etz jigix jëbi mjacmibijccixy Cristo. ²⁴Huen Dios may'ajt oy'ajt tunipy miid miich ajcxy huidibi yajmij'ajtcixp ajt nHuindzin Jesucristo huinixi huinitiempo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

El Nuevo Testamento en mixe de Coatlán

New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

